



UKA 2026/242
25/9-2026
Hans-Erik Enoksen

Inissianik attartorneq pillugu Inatsisartut inatsisissaatut siunnersuut

(Ineqarnermut, Attaveqaasersuutitut Isorliunerusunut Upalungaarsimanermullu Naalakkersuisoq)
(Siullermeerineq)

Siunnersuummut qujanaq.

Angerlarsimaffik angerlarsimaffiinnaanngilaq. Ilaqutariit ataatsimoorfigalugu, meeqqat peroriartorfigalugu, ataasiakkaatullu ulluinnarni eqqissisimaarfigisinnaassallugu toqqissisimaffiuvoq.

Tamanna pillugu inuit attartortut ersarissunik pisinnaatitaaffeqarnissaat, malittarisassallu suut atuunnersut ilisimanninnissaat pingaarutilerujussuuvuq. Soorunalimi attartortitsisunut taamatuulli. Sinaakkutit illuatungeriinnut tamanut ersaritsillugit toqqissisimaneq annerulersarpoq, aaqqiagiinngissutsillu ikinnerulersarlutik.

Tamanna pillugu attartortitsinermut inatsisip atuuttup maanna ataatsimoortinneqarnissaa, nutarterneqarnissaa, paasiuminarnerulersinneqarnissaa Demokraatit pitsaasutut isigaat. Ukiut ingerlanerini malittarisassat arlaleriarlutik allanngortinneqarnikuupput, ineqarnermullu tunngasut ilutigisaanik ineriartornikuullutik. Tamanna pillugu attartortut, attartortitsisut, inissianillu aqutsisut atugaannut inatsisip maanna naleqqussarniarneqarnera pisariaqarlunilu isumatusaarneruvoq.

Ilaatigut isumaqatigiinngissutaasut ilaannik attartortitsisartut namminersortut Ineqarneq pillugu Maalaaruteqartarfirmut suliaassanngortitsinissamut periarfissagissaarnerulernissaat nuannaarutigaarput. Suliap immikkoortumik attuumassuteqanngitsumik nalilersorneqarsinnaanera ataasiakkaat inatsisitigut isumannaallisaaffiqineqarnerinut pingaaruteqarpoq. Minnerunngitsumik ineqarnermut suliaasaqarfimmi isumaqatigiinngissutaasoq ataasiakkaanut, ilaqutariinnullu annertuumik kinguneqarsinnaatillugu.

Pisortat inissiaataanni pilersaarutaasumik, ataavartumillu aserfallatsaaliuisarnissap ukkatarineqarnerulernera pitsaasutut aamma isigaarput. Pisariaqartumik suliaasat kinguartinneqarsimanerisigut inissiat amerlavallaarujussuurtut ukiut ingerlanerini aserfallakkiartorsimapput. Tamanna siunissamut ungasinnerusumut akisuvoq, siullertullu inunnik inissiani ulluinnarni najugaqartussanik eqquilluni. Tamanna pillugu siunissamut ungasinnerusumut aserfallatsaaliuineq aningaasatigut akisussaasuseqarnerullunilu attartortut timikkut, tarnikkullu atugarissaarnissaannut aalajangiisuvoq.

Tusarniummut akissuteqaatit takutippaat, inatsisip nutarterniarneqarnera pingaarnertut tapersorneqartoq. Ilutigisaanilli pimooruttariaqakkatsinnik ernumassutinik aamma takutitsipput.



Ilaatigut ineqarnermut aningaasartuutit qaffaseratarsinnaanerit, qularnaveeqqusiussap annertussusaa, allaffissornikkullu aningaasartuutit ernumassutigineqarlutik. Malittarisassat nutaat inuit nalinginnaasunik imaluunniit appasissunik isertitallit angerlarsimaffittaarnissaannut, angerlarsimaffiminniiginnarnissaannulluunniit ajornarnerulersitsissanngitsut qulakkiissavarput. Ilutigisaanik attartortitsisartunut namminersortunut, aningaasaliisartunullu piumasaqaatit eqqumaffigissavagut. Inissiat amerlanerusut pisariaqartippagut, suliaasarlu taanna pisortat kisimiillutik kivissinnaanngilaat. Tamanna pillugu inissianut attartortitassanut aningaasaliinissaq, sanaartornissarlu soqutiginannginnerulersinnagu malittarisassat attartortunik illersuissapput. Sinaakkutit ersarissut, siumullu nalunangereersut attartortut, attartortitsisut, inuiaqatigiillu soqutigisaraat.

Suliffeqarfiit akornanni attartortitsinerit, nalinginnaasumik inissianik attartortitsinermit malittarisassat assinginik malittarisassaqaartussaaajunnaarlugit Naalakkersuisut tusarniummut akissutininik tusaaniarsimanerat, ilaatigullu siunnersuummik allannguisimanerat pitsaavoq. Tusarniaasimaneq ilumut pingaaruteqarsimasoq tamassuma takutippaa.

Inuit tamarmik toqqissisimaffigisaminnik, imminnullu aamma ilaquuttaminnut ulluinnarnik pilersitsivigisaminnik pitsaasumik angerlarsimaffeqarsinnaatitaapput. Inatsit inissianik amigaatigisatsinnik immini pilersitsisinnaanngilaq imaluunniit aserfallatsaaliuinissamik ajornartorsiutaasunik tamanik aaqqiisinnaanngilaq. Kisianni pisinnaatitaaffinnik pitsaasunik, pisussaaffinnik ersarissunik, sinaakkutinillu naapertuilluarnerusunik qulakkeerisinnaavoq.

Taamatut oqaaseqarlunga inatsisissatut siunnersuutip pingaarnertut siunnerfia Demokraatit tapersorsorpaat, Sanaartornermullu Ataatsimiititaliami nangillugu suliarineqarnissaa innersuussutigalugu.